

Rapport dalla sessiun dil cussegl da vischnaunca dils 20-03-2017

Tractanda 1

Approbaziun dil protocol dalla sessiun dils 14-11-2016

Il protocol dalla sessiun dils 14-11-2016 vegn approbaus en votaziun unanima cun engraziament.

Tractanda 2

Iniziativa per lantschar contractivas da fusiun ella Cadi

Venderdis, ils 17 da mars 2017 ha la vischnaunca da Tujetsch decidu definitivamein encunter l'iniziativa per lantschar contractivas da fusiun ella Cadi. En vesta che l'iniziativa era tractandada pil cussegl da vischnaunca da Trun ils 20 da mars 2017 ha la suprastanza communal contactau il giurist digl uffeci da vischnaunca Grischun. Quel ha confirmau che l'iniziativa seigi suenter il na da Tujetsch buca pli applicabla respectivamein buca pli realisabla ed ei sappi buca vegnir votau sur dad ella. Denton sappi la discussiun davart l'iniziativa tuttavia haver liug el cussegl da vischnaunca.

Il cussegl da vischnaunca meina discussiun davart il text el senn dall'iniziativa cun excluder la vischnaunca da Tujetsch. Suenter la discussiun ei il cussegl digl avis ch'ei duei dar ina votaziun consultativa buca ligionta per la suprastanza communal. Cun quei agir duei vegnir mussau anoviars in meini, e satisfatg aschi lunsch sco pusseivel al giavisch dallas 900 personas dalla Cadi respectivamein dallas 150 personas dalla vischnaunca da Trun che han suttascret l'iniziativa.

Per la votaziun consultativa vegn fatg ord il miez dil cussegl da vischnaunca suandontas propostas:

1. Sustener el senn dil text d'iniziativa da lantschar contractivas da fusiun denter las vischnauncas dalla Cadi, cun excluder la vischnaunca da Tujetsch
2. Dar alla suprastanza communal l'incarica d'evaluar las pusseivladads per collaboraziuns ni fusiuns; definar il process da proseguir, evaluar diefferentas pusseivladads, giudicar tgei pusseivladads ch'ei prudentas, collaboraziuns ni fusiuns

Suandontamein ils resultats dalla votaziun consultativa:

6 : 6 e duas abstenziuns per la proposta 1 (Sustener el senn dil text d'iniziativa da lantschar contractivas da fusiun denter las vischnauncas dalla Cadi, cun excluder la vischnaunca da Tujetsch)

7 : 5 e duas abstenziuns per la proposta 2 (Dar alla suprastanza communal l'incarica d'evaluar las pusseivladads per collaboraziuns ni fusiuns; definar il process da proseguir, evaluar differentas pusseivladads, giudicar tgei pusseivladads ch'ei prudentas, collaboraziuns ni fusiuns)

Tractanda 3

Elecziun d'in vicepresidente communal pil rest dalla perioda d'uffeci 2015 - 2017

Suenter che la vicepresidente Renata Decurtins-Deplazes ha remess siu uffeci sin la fin digl onn 2016 propona la suprastanza communal d'eleger gerau Toni Pfister sco vicepresidente pil rest dalla perioda d'uffeci currenta.

Cun 14 : 0 vuschs elegia il cussegl da vischnaunca gerau Toni Pfister sco vicepresidente communal pil rest dalla perioda d'uffeci 2015 - 2017.

Tractanda 4 Nominaziun dils commembers pil cussegl d'administraziun dalla OEFT

Il cussegl d'administraziun dalla societad acziunara OEFT dumbra sis personas. Treis personas vegnan nominadas dalla vischnaunca e las ulteriuras treis personas dil partenari Repower. L'elecziun dil cussegl d'administraziun succeda a caschun dalla radunonza generala dalla societad.

La vischnaunca e l'ovra Ferrera han differentas periodas d'uffeci. Pil cussegl d'administraziun OEFT vegn elegiu il matg 2017 ils representants per la perioda d'uffeci 2017-2020. Tier la vischnaunca vegn elegiu quest atun las autoritads per la perioda d'uffeci 2018-2020. Perquei ei la suprastanza communal secunvegnida cul partenari Repower AG da midar la perioda d'uffeci dalla Ovra Ferrera. La perioda d'uffeci dalla OEFT duei esser analoga a quella dalla vischnaunca.

Ils representants actuals Donat Nay, Dumeni Tomaschett ed Ignaz Schmed stattan a disposiziun per la perioda d'uffeci prolungida tochen la radunonza generala 2018.

Cun 13 : 0 vuschs ed ina abstenziun nominescha il cussegl da vischnaunca Donat Nay, Dumeni Tomaschett ed Ignazi Schmed per la perioda d'uffeci 2017-2018.

Tractanda 5 Verificaziun dil resultat dalla voaziun dils 12-02-2017

Cusseglia **Rafael Guldemann** declara che Furin Decurtins, Adrian Maissen ed el hagian sco commembers dalla cumissiun per verificaziun da votaziun controllau ils resultats dalla votaziun communal dils 12 da fevrer 2017 ed anflau tut en uorden. En num dalla cumissiun propona Rafael Guldemann da verificar ils resultats publicai.

En votaziun unanima verifichescha il cussegl ils resultats publicai dalla votaziun dils 12-02-2017.

Tractanda 6 Pusseivladad da tschentar damondas

Dalla pusseivladad da tschentar damondas vegn fatg diever.

Per il cussegl da vischnaunca

Il president	L'actura
Donat Albin	Sandra Gautschi